

**D**OMINI triplicitatis ascendens, & Solis cadentes ab angulis & infortuna in ascendente, ita quòd eius fortitudo ad malum intenditur.

Luna in occidente posita, non habens aspectum fortunæ, & quòd in uno angulo sit infortuna, nascetur quidem, sed non uiuet una hora.

Si Luna in quadrato infortunarum fuerit, & alia infortuna aspiciat ascendens, natus non habebit uitam.

Quando signum in quo fuit coniunctio uel oppositio precedens, & Alchocoden, & dominus termini Solis & Lunæ, & Ascendentis, & domini triplicitatis Solis de die, & Lunæ de nocte, etiam pars fortunæ, omnia hæc infortunata fuerint, natus ex utero matris uiuus non egredietur.

Omnes planetæ in sexta uel duodecima existentes, si eos dominus ascendens non aspexerit, natus non fruetur uitalibus auris.

Luna cum Marte in Medio cœli cum quibusdam conditionibus supradictis, & maxime si infortuna fuerint domini triplicitatis ascendens & Solis, natus egredietur mortuus, & frustratim.

Si fuerit Luna & Mars in ascendente, & Saturnus in occidente, natus egredietur mortuus, hoc tamen si fortuna non aspexerit Lunam.

Luna in occidente cum Marte, & Saturno in ascendente collocatis, & in conditionibus quibusdam supradictis, non uiuet natus per diem integrum.

#### De natis qui uiuunt, sed non nutriuntur.

**V**I maior pars dominorum triplicitatum hæc significantium, reperitur infortunata in cadentibus ab angulis. Item si Luna coniuncta Saturno in eius triplicitate fuerit, uel aspiciat ipsum ex quadrato, natus uiuet parum, & erit malæ nutritionis.

Eadem uero coniuncta cum Sole & Marte, breuem nato decernit uitam.

Si Luna inter duas infortunas posita, fortuna non aspexerit ipsam, parum uiuet natus, id quæ intellige etiam de infortunis stellis fixis.

Luna existente cum Sole in uno gradu, Saturnus aspexerit eos ex quadrato uel opposito, non nutrietur.

Si Sol & Luna in uno gradu fuerint, natus non uiuet duabus horis. Applicatio domini ascendens ad dominum octauæ, abbreviat uitam & impedit nutritionem.

Luna in Ariete in opposito Martis existente, si non aspiciat eam fortuna, erit natus debilis nutritionis, & uitæ breuis.

Domino ascendens & domino loci Solis & Lunæ, & parte fortunæ sub radijs Solaribus occultatis, natus erit paruæ uitæ.

Si caput draconis Lunæ, & ambo infortuna in quarto ab ascendente fuerint, natus non nutrietur.

Si fuerit Saturnus in ascendente, Mars in septima, natus uiuet parum, & malum habebit, donec uiuet.

Quando infortuna sese aspiciunt ex opposito, ita quòd una sit in ascendente, & altera in occidente, & Luna in Medio cœli, uel in occidente, natus non diu uiuet.

Saturnus in oriente, & Luna in occidente, natus parum uiuet, & erit turpis.

Si fuerit Saturnus in oriente, & Venus in occidente, natus parum uiuet, additis alijs quibusdam supradictis testimonijs. Nota quòd magna uis nutritionis, est per dominos triplicitatis ascendens & Solis in his quæ dicta sunt.

De his